

Txirritola

ARAMAIO / Barikua / 2003ko maiatzaren 16a / 64. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Aramaioko euskara aztertu dute liburu baten

UBANE MADERA

Udaleko ordezkariak lagunduta aurkeztu zuten zapatuan Txipi Ormaetxeak eta Patxi Uribarrenek *Aramaioko euskara* izeneko liburu. 600 ale plazaratuko dituzte.

Foru Aldundiak lagunduta, Udalak Aramaioko euskararen gaineko liburu argitaratu du: *Aramaioko euskara*. Aurkezpenean Patxi Uribarrenek euskaltzaina eta Txipi Ormaetxea (liburuaren egilea) egon ziren Udaleko ordezkariekin batera. Hala, Txipi Ormaetxeak esan zuen hasieran uste zuen baino lan sakonagoa egin duela: "Hasierako helburua Aramaioko hizkeraren oinarriak 100-125 orrialdetan ematea zen, baina azkenean luzeago eta sakonago egitea erabaki dut". Haren esanetan, kontua da horrelako argitalpenak ez direla urtero egiten, eta zenbait urtean egindako lana ez zuela argitaratu barik utzi gura. Edozelan ere, gaineratu zuen aditza eta lexikoa osatu beharrean utzi



Zapatuan egin zuten aurkezpena, kultura etxean.

ROSA MONDRAGÓN

dituela, aurrerago egiteko.

65-70 urtetik gorako hiztunak elkarrizketatu ditu libururako. Besteak beste, bertako hizkeraren lagintxo bat ere jaso du liburu-

ruan. Guztira 600 ale daude Aramaiorako. Txirritolako bazkideei banatu egingo diete liburu; gainerakoen artean, liburu gura duenak udaletxean eska dezake.



Hamalau taldearen aldeko ekimena

Hamalau taldearen lege kanporatzeagatik protesta egin zuten joan den barikuan 70 bat lagunek. Plazan batu ziren 20:00etatik 20:30era, eta antolatzaileek adierazi zuten, herriko tabernek bat egin zuten protestarekin eta ateak itxi zituzten tarte horretan. Hamalau aurrera doala eta Euskal Herriak aukeratutakoa errespetatzea; mezu hori zabaldu gura izan zuten.

Bertsolari Txapelketako bigarren finalaurrekoa



MIKEL ARANBURU

Legutianoko saioaren argazkia; tartean, Andere Arriolabengoa eta Iker Agirre.

Joan den zapatuan jokatu zuten Arabako Bertsolari Txapelketako lehenengo finalaurrekoa. Legutianoko kultura etxean izan zen ekitaldia, 100 ikusle ingururen

aurrean. Sei bertsolariren arteko norgehiagoka izan zen, Lierni Altunaren agindupean. Tartean, Iker Agirre eta Andere Arriolabengoa aramaiorarrak zeuden.

Bosgarren eta seigarren lekuan geratu ziren Aramaioko bertsolari biak. Hori bai, GOITBri esandakoaren arabera, egindako lanarekin gustura geratu ziren biak.

Irabazi Asier Otamendi gasteiztarrak irabazi zuen. Horrenbestez, dagoeneko lortu du ekainaren lehen jokatu den finalerako txartela.

MANEX FAVORITO

Eta bihar, zapatua, jokatu dute bigarren finalaurrekoa. Amurrioren izango da, 18:30ean. Bihar txapelketan Manex Agirre lehiatuko da, beste bost bertsolariren kontra, Irati Lotinaren gidaritzapean. Horrelakoetan ohi den moduan, puntu gehien lortzen dutenak sailkatuko dira Gasteizko finalerako. Edozelan ere, Ikerren eta Andereren esanetan, Manex da faborito nagusia.

LABUR

Bañera Kirol Elkarteak aurtengo bazkide kanpaina abiarazi du

Bañera Kirol Elkarteak bazkideek maiatzaren 31ra arte dute 2002-2003ko denboraldiko bazkide kuota ordaintzeko. Hala jakinarazi digu kirol elkarte horrek. Hamabi euro ordaindu beharko dira, iaz bezala. Ordainketa Vital Kutxan edo Euskadiko Kutxan egin daiteke. Horrez gainera, jakinarazi dute aurtengo ez dutela batzar orokorra egiteko asmorik, baina norbaitek eskatuko balu egingo luketela. Era berean, adierazi dute aurtengo denboraldian kirolari gehiago eta antolaketa lanerako lagun gehiago izan dituela Bañera Kirol Elkarteak; edozelan ere, horrekin batera nabarmendu dute parte hartu gura duenak ateak zabalik dituela. Bukatzeko, urteko gastuen berri eman dute: 2.815 euro, hain zuzen ere.

Areto futbol, zinema eta trakzio mekanikoko ibilgailuen gaineko zerga

Areto futbolari begiratu gero, joan den asteburuan Bañerako talde biek galdu egin zuten: kadeteek 8-4 La Milagrosaren kontra eta gazteek 0-4 Cafeteria Atenearen kontra. Bihar, zapatua, Laudioiko Ikastolan jokatu dute kadeteek, 10:30ean, eta gazteek Izarra Gorri taldea izango dute aurrez aurre, 11:00etan, Izarra-Gorri Ikastolan. Zinemari dagokionez, *Las Supernenas* filma emango dute.

Bestalde, Udaletik jakinarazi digute trakzio mekanikoko ibilgailuen gaineko zerga ordaintzeko borondatezko epea maiatzaren 19tik ekainaren 19ra artekoa dela.

M25 / ARAMAIOKO ETORKIZUNA AZTERGAI

Aldaketak M25 eta gero Litekeena da EAJ-EA koalizioa erabat nagusitzea



EAJ-EA

Mertxe Mondragon

ARAMAIO / 54 URTE / ETXekoandrea

Legegintzaldi honen bukaera aldean zinegotzi kargua hartu zuen, eta lehenago ere izana da zinegotzi Aramaion. Bera da alkatetzarako aurkezten den emakumezko bakarra.

Zein premia ikusten duzue Aramaion? Zein asmo dituzue?

Lehenik eta behin ikusi behar da EAJk Aramaion zein lan egin duen. Hortaz, nire lana horren jarraipena izango da. Adibidez, auzoetako gasifikazioa eta saneamendua oso garrantzitsua da; hor egiteko falta dena bukatu dugu. Era berean, oso inportantea da Aramaio bizitza edukitzea, jendeak hori sentitzea. Ez dakigu zelan egingo dugun, baina hori izango da gure erronka garrantzitsuetako bat. Proiektu gehiago ere bada: udaletxe berri...

Legez kanporatzea dela eta, zer iruditzen zaizu sortutako egoera?

Oso txarto. Egunez egunera aldatuta piloa daude eta ez dira onerako. Aramaion, adibidez, hAMAlau plataforma ilegala da, esaten dute ETAKoak direla, eta nik ez dut ikusi oraindik hori probatu dutenik edo delituren bat egin dutenik. Ez nago ados. Aramaion emaitzak aldaraziko ditu; izan ere, orain arteko botazioetan eurek eta guk lortu dugu ordezkari. Hortaz, litekeena da ardura guztia gure esku geratzea, eta hori ez da ona.

Irabaziz gero, Aramaio lehenengo emakumezko alkatea izango zinateke; pozgarria da, ezta?

Bai, oso interesantea da. Ni neu oso pozik nengoke lehenengo andrea banintza. Dena dela, uste dut emakumeok lan handia dugula egiteko oraindik ere. Edozelan ere, esan beharra dago horrekin batera, emakumeek euren gainean ardura piloa dutela, hortaz, apur bat urrun ikusten dute emakumeek euren burua horrelako lanetan, batez ere, orain gutxira arte gizonezkoen lana zela uste zelako. Baina, pentsatzen dut andreak sartuko direla eta sartu behar gara, gainera!

“Aramaiok bizitza edukitzea izango da gure erronketako bat”



PP

Enrique Aguirrezabal

GASTEIZ / 42 URTE / DIPUTATUA

Arabako Foru Aldundiko Ongizateko diputatua da PPK aurkeztu duen alkategaia. Alderdi Popularrak sekula ez du ordezkari izan Aramaion; hain zuzen ere, hori da euren helburu nagusia.

Zein helburu ditu Alderdi Popularrak Aramaiorako?

Apustu serioa egin dugu Aramaio Udaletxean aurreneko aldiz ordezkari lortzeko. Araban dauden 9 alkatek herrietan, gobernuan zein Diputazioan egindako kudeaketaren babespean aurkeztuko gara.

Zein proposamen dituzue Aramaio lehenengo emakumezko alkatearen beharrei aurre egiteko?

1: Aramaio inguruko gazteak erakartzeko gune bilakatu gura dugu; horretarako gazteendako ekimenak bultzatuko ditugu eta babes ofizialeko etxebizitzak egingo ditugu.

2: Aramaio turismoa indartu gura dugu, dauden azpiegitura turistikoak bultzatu eta plan berriak egin. Uste dugu Aramaio bisitariak erakartzeko aukera handiak dituela.

3: Pertsona nagusiekiko arreta indartuko dugu, etxer etxeko zerbitzua hobetu eta egoitzetan nagusien arretarako eta eguneko zentroak bultzatuko ditugu.

4: Enpresen benetako beharretan oinarrituta, emakumeendako heziketa eta trebakuntza ikastaroak ezartzeko asmoa dugu.

Zein da herriko plataformen legez kanporatzearen gainean egingo duzun balorazioa?

Alderdi Popularretik uste dugu oraingo hauteskundeetan demokrazia berrindartu egingo dela; izan ere, demokrazia ezarri zenetik, lehenengo aldia da ETA talde terroristaren indarkeria baztertzen ez duen alderdi politikorik aurkezten ez dela.

Demokraziak herritarrek bizitzeko duten eskubidea babestu behar du; baita herritarren osotasun fisikoa ere. Hori guztiori Zuzenbidezko Estatuaren oinarri moduan.

“Apustu serioa egin dugu Aramaion ordezkari lortzeko”



HAMALAU

Jon Uribarren

ARAMAIO / 33 URTE / FRESATZAILEA

Jon Uribarren aurkeztu du hAMAlau zerrenda buru. Eta, ilegalizazioaren eraginez erakundeetan parte hartzeko aukera kenduz gero, herriaren alde lanean segituko dutela esan digu, besteak beste.

Zer diozu legez kanporatzeaz?

Herriaren zati bat berba eta aukera barik uztea izugarriko astakeria da, inolako arrazoi juridikorik gabea. Espainiarrek ez dute Euskal Herririk nahi eta horren alde lanean gabiltzanok joko zelaitik kanpo uztea da bide bakarra eurentzat. Hala ere betidanik jakin dugu lana egiten eta oraingoan ere egingo dugu: erakundeetan nahiz erakundeetatik kanpo eta horretarako badugu hamalau arrazoi.

Edozelan ere, hauteskundeetan parte hartuko duzuela iragarri duzue, zergatik? Eta zelan?


Herriak hori erabaki du, hala adierazi du sinaduren bidez ere. Herritar asko eta asko eskubiderik gabe gelditzen ari gara eta erantzun beharra dugu. Espainiak ezkertzeak eta abertzaleak desagerrarazi nahi gaitu eta ezin dugu onartu. Gure boza, aldaketaren boza da, inposaketaren aurkakoa, desobediencia. Autodeterminazioa aktibatu beharra dugu, hortik etorriko baita herri honen konponbidea.

Maiatzaren 25ean hAMAlauren botoak egongo dira. Aurrez banatuko ditugu. Saiatuko gara inor gera ez dadin boto barik. Zailtasunak izango ditugu baina aurrera egingo dugu. Gure botoa inoiz baino baliagarriagoa eta aktibagoa izango da, batez ere egoera larri honetan. Aznarri min handien egiten diona hau da: gure botoz betetzea kuxkak.

Hauteskundeetan ostean zer?

Botoen arabera dagozkigun zinegotzi karguak hartzen saiatuko gara. Udalean egongo gara ekainaren 14an. Dagozkiguna eskatuko dugu, errespetatzea. Esperatu dugu alderdiek ere errespetatzea. Edozelan ere, herriaren eta herriaren alde lanean jarraituko dugu.

“Saiatuko gara inor gera ez dadin gure boto barik”



PSE-EE

Mario Onaindia

LEKEITIO / 55 URTE / IDAZLEA

Politikagintzan aspaldiko ezaguna da Mario Onaindia. Euskal sozialismoan ibili izan da betidanik, Euskadiko Ezkerran lehenengo eta PSE-EEen gero. Senadore izan da bi legegintzalditan.

Zeintzuk dira PSE-EEen helburuak Aramaiorako?

Lehenik eta behin askatasuna lortu nahi dugu. Denok dakigu udal hauteskundeak oso garrantzitsuak direla, azpiegiturak, parkeak, zolatze lanak... horrelakoak Udaletxetik bideratzen dira-eta. Baina, horrez gainera, uste dugu Udaletxea edo herria askatasun leku bat ere izan behar dela. Falta hori nabaritzen dugu. Gu mehatxupean gaudu, egin nahi ditugun gauzak egiteko (umeak eskolara eramane, liburu dendara joan...) bizkartzainekin ibili behar gara. Uste dugu askatasun hori falta dela. Eta hori ez dela bakarrik Ertzaintzaren edo Guardia Zibilaen lana, herritarrena ere badela. Hauteskunde hauetako gure ikurrina askatasuna lortzea da.

Legez kanporatzearen prozesuaren gainean zein iritzia duzu?

Beste legez kanporatze bat ere egon da: sozialistena eta PPko jendearena. Azken lau urteotan lau zinegotzi hil dituzte eta jende asko klandestinitatean bizi da. Horren aurrean euskal gobernuak ez du ezertxo egin. Jende hori dago mehatxatuta eskema demokratikoa defendatzen duelako eta euskal gobernuak eta alkate askok ez dute hori defendatzen; defendatzen dutenak ETAn biktima bihurtu dira, eta Ajuria Eneko Ituna apurtu zenetik Madrilgo Entzutegi Nazionaleko eta Epaitegi Konstituzionaleko epaileek askatasuna zaintzeko beste pribilegio batzuk moztu behar izan dituzte. Batzuk modu normalean eta legalean bizitzeko ezinbestekoa izan da legez kanporatzea.

Zuen asmoak Aramaiorako?

Adibidez, Eguzkierrapeko urak direla, Errotaberriko kanalizazioa, Matxaingo bidea konpondu, Arexolako plaza urbanizatu, gora doan bidea zabaldu...

“Uste dugu une honetan garrantzitsuena askatasuna lortzea dela”